

Յետոյ պատուելին ընդառաջ եկաւ, ընդունեց մեզ, որպէս մի մարդ, որ իր տանը հիւր էր ընդունում, այդ խօսքերով:

– Բարով էք եկել, հազար բարով, իմ աչքի վրայ, իմ գլխի վրա...

Յայտնի չէ, թէ այլեւս նրա որտեղի վրայ պէտք է լինէր մեր ընդունելութիւնը, որովհետեւ աշակերտներից մէկը այդ միջոցին փոթկաց, եւ պատուելի ճառը ընդհատեցաւ: Նա երեսը շուռ տոեց դէպի եղեռնագործը եւ ձեռքով սպառնալով՝ մրթմրթաց. «սպասի՛ր, գարշելի»...

– Ի՞նչ են սովորում այստեղ, – հարցրեց Ասլանը:

– Ամէն բան սովորում են, պարոն, – պատասխանեց պատուելին, աջ ձեռքի ցուցամատով աջ կողմի պնչածակը քշփորելով, – ինչ որ կամենում էք, հարցրէք, բլբլուլի պէս պատասխան կը տան:

– Այդ լաւ է, – ասաց Ասլանը ժպտալով:

– Տեսնո՞ւմ էք այդ փոքրիկին, պարոն, – նա ցոյց տոեց մի ութ տարեկան երեխայ, – կարող է ամբողջ «Չայր-մերը» թարսայ ասել:

– Ինչպէ՞ս թարսայ ասել:

– Այնպէս... այսինքն... զօր օրինակ... տակից դէպի վեր... այնպէս ասել, – պատասխանեց պատուելին կակազելով:

– Երեւի դրանում մի առանձին միտք կայ, որ դուք «հայր-մերը» թարսայ էք սովորեցնում, – հարցրեց Ասլանը լուրջ կերպով:

– Ինչպէս չէ, պարոն, այո՛, առանձին միտք կայ, պարոն, – կրկնեց պատուելին վարդապետական եղանակով: – Երբ «Չայր-մերը» թարսայ են կարդում, Յիսուս Քրիստոսի շնորհքով, սատանան իր պոչի վրայ մեխում է գետնին, էլ չէ շարժում տեղից: Դա փորձոած է, շատ անգամ փորձոած է, պարոն:

Ասլանը դարձաւ դէպի փոքրիկ աշակերտը:

– Դէ՛, իմ քաջ, տեսնե՞ք՝ ինչպէս ես սատանային պոչի վրայ կանգնեցնում:

Փոքրիկ աշակերտը վեր կացաւ նստած տեղից, երկու ձեռքերը միմեանց վրայ կպցրեց կուրծքին, երկու անգամ հազաց եւ անմեղ աչքերը պլշացնելով, կարդաց. «ամեն յաւիտեան փառք եւ զօրութիւն եւ արքայութիւն է քո զի»...

– Բաւական է, – ընդհատեց Ասլանը, – այս անգամ սատանային հանգիստ թողեցէք: